

## Pammileang kapala daera

Tanggala ruang pulo antuju bulang lima 2005 gitte iangase' rajja'a ri Bulukumba lammileki bajung kapala daera 2005-2010.

Iami inni narapi'i pa'pasangna tau riolota angkua:

“Rie' se're hattu na lasiri'i tanaya, lanipile lamungang tangnga a'timbo, a'ra'i nihaung pojo'-pojo' anrabbaya.”

Rley eser hŠ n  
l SR tny, l N-  
Pel l ^ qq tq  
a Tbo, a rA N-  
h Y q poj opoj o  
a r by .

Battuangna:

1. *Lasiri'i tanaya* (buttaya)—Pilei taunna memang lo'lorangna battu-battu ri boheboheha turungang ammententi, napanaike juku' sumaha, napanjari tinanang, nangngitte pada-pada.

2. *Lanipile lamungang tang-nga a'timbo* —Anre' garringna ri padanna na rupa tau, ammentengi natuna, a'cidongi na kamase-mase pau-pau, angka' bangkengna sito'roi panggaugangna.

3. *A'ra'i nihaung pojo'-pojo' anrabbaya*

—Anre' nanggera ri padanna tau, ia nihoja ri tau loheha, nasaba' pa'mae' bohe-boheha, tau toana anjari lamunglamung tangnga labbusu.

Jari punna lammileki bajung kapala daera kihojai nu'kullea lisa'i lisa'na tunilabbiri'ta riolo nunjampai rajja'na. Naia nutallu-a lomoro irate, masagala napa'bakkaki pa'sangalinnu sossorang napammase, na'bugga, sinara ri lino tarrusu ri allo ri bokona Alla-taala, nasaba' parrangi na sab-bara, tunai nakamase-mase, apa nabicara ia gau'na.

Rie' sikidi pangngajara'na petta Kulahu daeng Mattona angkua: “E ana', hajikangi kalumannyang taua naia kalumannyang apa-apaya.”

Lanri kamuanami injo pasang-pasang tau rioloa kipile laloi taunna. Ara laloki anjari tau lappara, battuangna anre' na kipa're na kingngera pa'balanja.

Andi Mattaisseng, Herlang

Ri sura' kareba inni rie' pa'nassaang ri sesena massing calong bupati siurang gau'-gau' nulana-paumbaya punna ia nai'. Kibaca haji'-haji'i, nampa kipile.

**Bateii rolo' calonga, apa pangngitte lerena (visi) na apa lanagaukang (misi). Nampa kipilemi battu ri ati caddita.**



**1** PPP, PBR, PKPB

H. ANDI SYAHRIR SAHIB, S. Pd  
Bulukumba, 2 Maret 1946  
Bahinenna: Hj. ANDI NUSMA;  
annang ana'  
Sikolana: SMA Negeri 1966; APDN  
1975; S1 UVRI 2002

Drs. H. MOHAMMAD ARIFIN,  
MM  
Bulukumba, 10 Juli 1950  
Bahinenna: Hj. AMINAH; 5 ana'  
Sikolana: SPG PGRI Makassar  
1970; S-1 FKIP UNCEN Jayapura  
1987; S-2 STIE WIDYA  
JAYAKARTA Jakarta 2001

**Kasabbiang jamaangna:**  
Wakil Camat Herlang 1975-79;  
A'buabuang Kasi ri Kantor  
Daerah BLK 1978-88; Kasi Peng-  
adaan Dinas P&K BLK 1988-90;  
Kabid Penataran Kantor BP-7  
BLK 1990-91; Camat Ujung Bulu  
1991-96; PMD BLK 1996-98;  
Asisten Tata Praja 1998-2000;  
Wakil Bupati BLK 2000-05.



**2** Golkar

Drs. H. MAPPIGAU SAMMA, M.Si  
Bulukumba, 15 April 1947  
Bahinenna: Hj. ST. RAMLAH;  
rua ana'  
Sikolana: SHDN; S1 SOSPOL  
UNHAS; S2 UNHAS

Drs. MUTTAMAR  
Bulukumba, 11 Oktober 1968  
Bahinenna: A. MAJNAH, SE;  
lima ana'  
Sikolana: SMA; S1

**Kasabbiang jamaangna:**  
SEKWILDA Pinrang; KARO BINA  
Otonomi TK1; KARO Kepega-  
waian; SEKDA Bulukumba.



**3** PKP-I; PSI;  
PPIB; PPNU

Drs. H. A. SYAFRUDDIN AMJAR  
Bulukumba, 21 November 1947  
Bahinenna: Hj. S. BAU TJUT  
MUTIAH; appa' ana'  
Sikolana: SMA Negeri 1968;  
APDN UP 1978; STIA  
LAN Makassar 1978

**ABDUL KAHAR MUSLIM**  
Bulukumba, 05 Mei 1960  
Bahinenna: ANDI NURLINDA,  
S.Pd; appa' ana'  
Sikolana: SMAN 198 Bulukumba  
1980; Tekhnis Sipil Unhas  
1980 (anre' na'tamma')

**Kasabbiang jamaangna:**  
Mantri PolPPraja Bonto Tiro 1978;  
Kasi Pengawasan Dipenda BLK  
1979; Bag. Keuangan Setwilda  
BLK 1980-81; Bendaharawan  
PEMILU BLK; TKI 1982; Staf  
Setwilda TKI 1982-87; Camat  
Gangkung 1987-94; Kep. Bag.  
Keuangan Setwilda TKI 1993-94;  
Kep. DIPENDA BLK 1994-98;



**4** PDI-P; PKB; PBB

A.M. SUKRI SAPPEWALI  
Bulukumba, 22 Oktober 1956  
Bahinenna: Dra. Hj. ROSNA  
ROSMAN; tallu ana'  
Sikolana: SMA Nasional Makassar  
1975; AKABRI darat Magelang  
1980; SUSLAPA BEKANG  
Bandung 1990; SESKOAD  
Bandung 1995; SUSJEMEN  
HANKAM JKT 1999

Drs. H. PADASI, M. Si  
Bulukumba, 1950  
Bahinenna: Hj. YETTY  
HERAWATI; appa' ana'  
Sikolana: SPG Bulukumba 1970;  
Sarjana Muda A2N 1974; S1  
STIA LAN 1984; S2 Unhas 1999

**Kasabbiang jamaangna:**  
DANTON KODAM 1981-82;  
Pengamanan KODAM 1982-83;  
DANKI ANGMOR 1983-87; DAN  
SATANG AIR 1987-89; WADAN  
YON KOSTRAD 1990-94; DAN  
DENANG 1994-97; DAYONG  
ANGRAT DITBEKANGAD 1997;  
KABANG DITBEKANGAD 1997-  
99; DAN-DEN BEKANG 1999-  
2001; PADYA MABES TNI 2001-02;  
KA BE-KANGDAM 2002-05.



**5** PNI Marhaenisme;  
PAN; PNBK; PPDI;  
Partai Demokrat;  
PDS; Partai Patriot  
Pancasila; PPD;  
Partai Pelopor

Ir. ANDI MAHFUD  
MANSYUR  
SULTAN  
Bulukumba, 28 Pebruari 1965  
Bahinenna: LELLY LATIFAH;  
rua ana'  
Sikolana: SMA Negeri II Makassar;  
Universitas Trisakti Jakarta

Drs. H.A. ABD. MANNAN  
SYAMSUDDIN, APT, MSI  
Bulukumba, 22 Juni 1950  
Bahinenna: Hj. NORMA. A.M.;  
tallu ana'  
Sikolana: SMAN II Mkr; S1  
UNHAS Farmasi 1977; S2  
UNHAS Lingkungan Hidup

**Kasabbiang jamaangna:**  
Ketua BPM FAL; Ketua DPD PAN  
Bulukumba; Konsultan Pariwisata  
dan Perencanaan Kota Pengem-  
bang.

Iangase' pa'kuta'nang raha mae nihaju ri Prof. DR. H. Hasyim Aidid, MA, guru lombo Hukkung ri IAIN Alauddin ri Makassar. Nagaukangi ri sesena kahajikangna rajja' Bulukumba nulampilei bupati beruna. Pa'pihalinna battu ri massing calong bupati to'ji.

### 1. Ri sesena kalenta a. Apa ampagoeki na kia'ra' anjari bupati?

—Pa'geo' nusanna'a pore battu ri pa'toa sibatu kacamatang.  
—Lakupa'tarrusui pa'paentengang numaengamo kugaukang a'rurung pa' Patabai nupoko'a ri sesena ajarang Sallang.  
—Nakkemi a'rurung pa' Arifin lampanjarri kedde' Bulukumba labbi balloang.

—Gara-gara nakke tau nianakang ri Bulukumba parallu ampaentengi na kusipanjamaang rajja' Bulukumba sollanna hajikang pa'dibokoangna.  
—Gara-gara kasabbiangku salamang tunjagai kamponga, kuare'i a'kullea anggaukang pata'pinraang ri a'buabuang palakara.

Naia numpageo'a anjari calong bupati, iamintu gara-gara pa'tungku'na pa'toa rajja'a: pa'toa agama, pa'toa pa'sikolaang, pa'toa pakoko na maraengangnaya pole. Kuare'i pa'suro nuparallu kugaukang, mingka manna pakunjo a'poko' ri pa'kulleku to'ji na rie' todo' kaparalluanguku ampa'bakka'i pa'kulleku.

—Gara-gara pa'kamasena Alla-taala numpageo'i atingku lanjampai ri daera.  
—Gara-gara pa'tanggongangu ri rajja'a na kua'ra' anjampai ri pa'rasanganguku.  
—Kugaukang a'ra'na na pa'geo'-na mahasiswa Bukukumba siurang pa'toa rajja'a na pa'-toa agama, nampa pole situju bahinengku na russana'ku na bija-bijanguku.  
—Gara-gara a'ra'ku angngitte rie' pa'pinraang ri sesena batena ammententi siurang batena rajja'a a'tallasa a'samaturu' ri Bulukumba.

—Parallu nipokokang nu'kullea nigaukang sollanna daerata ammentengi kale-kale ri sesena SDA (nu'kullea niuppa battu ri tana na ere), nampa pole ri sesena SDM (nu'kullea niuppa battu ri tau) landalleki kasampang a'danggang loloasa.  
—Pammarentaang nutangkasa na nu'haji' assele'na na nu'tanggong.  
—Anggaukang lingka nubungasa ampanjarri Bulukumba pako' panjampai nunikaddori ri pa'kokoang na pa'biring tampa-ranga na pa'tamparanga nampa pole ri pa'danggang lombo.

Kiitte sai ri lahara maka tuju su'runng sampulo, ka kunjoi rie' pa'pihalinna iangase' massing-massing calong bupati.

**Ere tangkasa ri Tanajaya**

Iangase' nu'nyahaya ri linoa, padaya rupa taua, olo'-olo', manna pole lamung-lamung, naparallua ngase'i nikuaya ere nampa a'kulle haji' tallasa'na. Mingka injo erea, a'kulle to'i a'pibattu kamateang punna ta'lalo lohei, padayami punna baloboi.

Ialangna kampong Kassi' na Daloba siurang Jalaya, kalurahang Tanajaya sama susana niuppa nikuaya ere tangkasa. Punna angngekeki buhung sanna' lantangna nampa angnguppaki timbusu, biasa to'i ita'jaki angnguppa timbusu mingka apajjai isse' erena kambanii tamparanga. Na punna battui bambang alloa tutabbalaya ri kamponga injo parri'i angnguppa ere tangkasa. Se're mami buhung narumung taua ampanggallei ere iamintu buhunga ri Limbua'.

Iami injo naitte pammarentana Bulukumba nuri kulle kapang taung 1980 nahajui injo buhunga anjari PDAM. Nanapalo'loro erena mange ri tungga-tunggala balla'. Sanggenna tutabbalaya anre'mo naparri' ri ere tangkasa. Mingka sanggennaji kulle kapang taung 1999 tutabbalaya napisa'ringi ammakea ere tangkasa ka masinanna ia a'panai'a/ a'pa'lo'loroa ere panra'i, nampa kapang anre' nakullei nipakahaji'.

Nasaba' ri bulang sampulo anrua 2002 pammarenta Bulukumba nasambe injo masinanna pangngiso' a'pa'lo'loroa ere, manna pole pipa a'runga erena, mingka iangase' injo pa'sambena nucaddi-caddi ngase'. Sanggenna inni alloi injo erea anre'pa na nipa'bageangi ri tutabbalaya, na tutabbalaya ri tallua kampong sumpae' kupaua parri' pole ri ere tangkasa. Napallabbang pammarentaya inai a'ra' angngalle ere a'kullei napantama' arengna ri kantoro lura, mingka tala lohepi tau a'pantama' areng, ka nakamallakangi anre' napada hattunna najama PDAM, saba' masinanna na pipana caddi' ngase'. Nampa pole anre'pa tau nipatabaang pipa mange ri balla'na, injomi na anre'pa nangngitte taua angngera lompona erena, a'kulle minto'ji nalabbang taua sibatu kampong. Parallu kapang nisare pa'coba mange ri balla'na taua, sollanna tutabbalaya angngittei matanna, na'kulle a'ra' todo' angngallei ere. Lapaduli, Kajang

**Pasara Kassi'**

Ia nukuaya pasara iamintu pasiitte-angna pabalu'a na pahallia. Punna pabalu'ja rie' manna lohe anre' nikuai pasara, pada to'mi punna pahallija lohe anre' to'ja na'kulle niare' pasara.

A'pakua'mi injo ri Kassi', anre' na se'reja pasara mingka lohe ta'talasa ri biring annoranga, ka lohe sikali pa'goppo-goppoang pa'balukang ri biring annoranga. Pakua'nami injo kulle kapang lohe rugina pammarenta ka kurangi bea antama'. Naia riolo ri hattunna pasaraya anre'pa nanipalette' mange ri Ta'rongkolang sanna' roa'na, nampa pole se'reji pa'pasarang. Apa saba'na? Kulle kapang sala se'rena iamintu:

1. Injo pa'pasaranga nalalloi oto, jari anre' sessa tau angngera balu'na na lante ri pasaraya.
2. Ambani pa'balukang juku' hasaya.

Mingka punna ri pasaraya kamunni-na (Ta'rongkolang) anre' oto a'ra' nai' angngera pabalu', iami injo rajjini nasa'ring pabalu'a ka tala na'kulle naerang balu' mange ri pasaraya ri Ta'rongkolang. Ante'i annimporong kunjo to'mi nabalu' punna rie'mo pahalli. Iami injo na lohe goppo-goppo pasara.

Sikurang bulangmi lohe nahaju tau ri sesena pammileang kapala daera, manna ri Bulukumba kampongta, manna ri sibatuna Indonesia nagarata. Lohe kareso na lohe todo' doi' nipansulu' ri taunna massing calong bupati siurang pa'sambena sollanna a'kullei niangka' anjari calong, na sollanna todo' iangase' rajja'a a'kulle angngisse'i angkua inai sirattang nipile. Yayasan Bulu' Kuuppa annulung to'i ampasadiangi *brosur* lombo nukiittea ri massing-massing kantoro na masigi' na antere'-tere'. Pa'tujungna nipa'nassai kariekang calong bupati nulimaya siurang pa'sambena sollanna a'kulle kipile battu pangngisse'ta, tania gara-gara nipassaki ri doi' iareka tau.

Ialang bulang annang inni la'roa-roa' isse' taua ri hattu *kampanye*. Aminahang to'maki situru' a'ra'ta, mingka a'kaati-atimaki sollanna anre' nanjari kacilakaang. Nakke tau battu pantarangja, na kukalereii pa'roa'-roakang ka a'bugga ba'laloa na anre' kungai nirumung ri tabbala tau. Manna kamua injo a'ra' to'a angngisse'i inai ri limaya calong bupati kaminang sirattang anjari pammarentata ri sibatu Bulukumba.

Gitte tau ma'kamponga angngisse' kariekangna pa'rasangengta. Kiisse'i angkua rie' lohe pasikapangang punna a'ra'ki a'kareso. Kiisse' to'i angkua rie' tau anggaukang nutala

**Kasampangang anjama: paukiri**

Sura' kareba **Bulu' Kuuppa** a'boja tau nu'kulle angngukiri na basa Konjo. Kasampangangna tau nu'kullea antama' iamintu napalantei pa'pau ri sesena nunjaria ri desana a'genna kacamatangna iareka pantarang pole. Nunihojaya iamintu talia tau numaccaya a'karang, mingka tau nusadia a'kulleang na a'pilajara a'karang. Ri maengnapa ga'ra sikura hattu nampa nipa'se're nijara ri sesena antere' pakua bateta a'karang. Iangase' tau nu'kulleanga a'karang lanisarei pa'rannu-rannu sikiddi iamintu doi'. Na ri sesena tau numaccaya a'karang iareka a'kulleang na ballo, rie' pasikapangang nipagaji sallo'.

A'pikatumaki sura' mange ri kantoro cama'ta na kipau arengta na pamman-tangangta, na apa kasabbiangta iareka pa'tujungta a'karang. A'basa Konjomaki.

**Battu ri Jannang Karebaya**

sirattang na numpakarugi rajja'a. Nakke kulanggere'naja kareba. Kullei kasampangang iareka kasaheang inni ampansulu'i pangnguppaku, na rupa'na a'ra'i kilanggere.

Ri sesena pammileang, manna tau tinggi pangka'na, manna tau niare' tau caddi iareka tau kaasi-asi na anre' kale anjampai, pada ngase'jaki ri sesena pammileang kapala daerata. Massing annijjo'ki ta'sikali, na massing a'kulle annijjo' battu ri ati caddita na anre' naitte tau maraeng. Massing a'kulle annijjo' manna anre' kiisse' ambaca angngukiri nasaba' rie' lamoro'na siurang gambara'na massing-massing calong.

Punna rie' tau ammaeiki battu ri taunna se'rea calong ampaleceki na lohe janji ballo, aramaki tappa' antarimai. Kiparessai rolo' pangngitte lerena (*visi*) siurang apa lanagaukang (*misi*) nurie'a ri sura' kareba inni. Nampa kikuta'nangi punna rie' anre' nasanna' nassa iareka punna riekija a'ra' kiisse'. Ante' pakua sintoje'na batena anjampai rajja'a?

Kulle kapang kiu'rangi kasabbiang maraeng ri sesena tau a'ra' nipile na lohe najanjangki. Apa assele'na ri maengnamo nipile? Iareka rie' nahaju sollanna kiare'i tau haji', gaci'na ampakahaji' annorang ri ampi' balla'ta iareka

a'baju lete palappara. Sikurang juta rupia nauppa ri kalenna? Sikurang bulang ri maengna nihaju na panra' iangase'? Calong bupati anterea rie' kasabbiang angkua tau kuntu tojenga toje', iareka tau anjampai toje'i rajja'a? Iami kipile kedde'!

Punna napaleceki na doi', battuangna lanahallii pa'tijjo'ta. Punna doi'ji kihaja na talia pangngisse' larugiki sallo'. Punna doi' napake ampaleceki battuangna kamua injo batena ri iangase' nuna-hajua. Anre'mo nasare doi' ri tau punna rie' nakaaraki, injoka doi'mi nahaja ri sesena kalenna ri iangase' nunagaukanga. Maka kiisse'i tau nu'pakunjoa? Anterea calong bupati nukamase-mase na nummake doi'na pammarenta iareka doi'na to'ji ri sesena rajja'a? Iami kipile kedde'!

E iangase' tau nurie'a tolinna, allangngere'maki!

E iangase' tau nurie'a akkala'na, a'pikirimaki rolo'!

Aramaki tappa' aminahangji ri nunasuroangaki pammarenta caddita iareka nunakuangang sambarang tau.

Gitte to'ji a'pikiri!

Gitte to'ji ammile!

Ara lalomaki ta'kaririki ri doi'ji! A'nassami larugiki sallo'!

Pakua'mi injo pangnguppata tau pantarang kamponga.

Battu ri daeng Langkasa siurang daeng Sinara

**Patanggong:**

Yayasang Bulu' Kuuppa  
Kotak Pos 1419  
Makassar 90014

**Pammanralang:**

CV Adi Perkasa  
Jalan Talasalapang  
Ruko BPH Blok 0-1 No.B  
Makassar 90022

**Ohang nupimbalia**

**Pa'bura-buraang**

**Rie' se're pa'rongo pangnguppata ri sesena saba'na na'compa' bura-bura ri tallasa'na tau; appa' buangangna na a'kulle to'ji rateangna.**

- gara-gara malla'
- gara-gara tampo
- gara-gara anda ta'seleng-seleng
- gara-gara andai a'dabbung arengna

Ebara'na pungkahaya anggaukang nusala iareka nukodi nutala sirattang kedde' ri ia. Manna nagaukang injo sumpae'a anre' naakuii ka punna kamua injo a'dabbungi arengna.

Ebara'na se're anrong la'lampai a'pasara iareka maraenga nalampai, a'bura-burai ri ana'na nulammihanga ka andai ta'seleng-seleng.

Ebara'na pole tau biasa anggaukang nusala numbaliang ada' iareka numbaliang pammarenta, punna niparessa ri pulisi andai naakuii panggaungkana lantaran malla'na.

Ebara'na isse' tau ta'kapau-pauang haji'na nanggaung kodi, anre' naakuii ka tampoi lanri ia tau ta'kapau-pauang.

Inni ri linoa sukkara taua ampahangi angkua injo bura-buraya manna caddi manna lombo padaji doraka na massing rie' pa'balasa'na. Saba'na ka iangase' rupa tau rie' bura-burana manna caddi manna lombo.

Punna nihojai, antere'i kedde' battu injo bura-buraya ri ammulanna?

**Pangnguppata tau maraeng**

Apaji ri tallasaya nigaukang na nusala na kodi parallu niakui, kuddeka gitte tau lombo pangka' iareka tau biasa padaji. Ka punna anre' niakui ma'nassa a'bura-buraimaki naung.

Injo bura-bura anre' nammile tau. Tau lombo pangka' iareka tau biasa, padaji. Assalang rupa tau ri bura-burana punna anre'pa pangngali'na ri Puang Alla-taala.

Situru' pangnguppaku nakke, assala'na bura-buraya ri uru-uruna iamintu nubattu

ri *setang*. Rie' caritanna pakunni; hattunna nabbi Adam a'rurung Sitti Hawa rie' ri suruga nibura-burarii ri setanga ri sesena bua kaju (*bua khuldi*) angkua injo ballo nikanre na a'sipa'. Injoka injo lapung bua kaju napa'piranggaang Alla-taala nikanre.

Anre' kukulle ampasimmarangangi bura-buraya angkua sikura buangang. Iaji niare' bura-bura punna anre' kiakui panggaung-ta manna nuhaji' manna nukodi kuddeka rie' angkuta'ngangi. Saba'na tampo iareka malla' iareka apaji anre' kupa'tantui.

Sintoje'na iangase' rupa tau rie' ati caddina ampataru'rangii ri sesena nulanagaukanga iareka numaenga nagaukang nasala.

Ebara'na palukka' nubiasaya a'jugara ri kamponga, rie' ati caddina ampataru'rangii ri sesena panggaungkana mingka andai nalangngere iami injo na'tallasa a'bura-bura tarrusu.

Injo bura-buraya punna a'aka'mi ri tallasaya sukkara nihubbu'. Ka anjarimi kabiasaang.

Se'reji a'kulle ampa'tanre'i aka'na bura-buraya ri talasa'na rupa taua iamintu punna rie'mo kataru'rangiang ri tallasa'na ri sesena Alla-taala Puang papa'jarina. Na rie' to'mo pa'pisa'ring angngali' na malla' ri Alla-taala.

Apa pangnguppata gitte pabaca? Maka napasimmarang Alla-taala bura-bura katallasang na bura-bura toje'?

Ebara'na ri sesena bura-bura katallasang: Rie' tau maeng anggandeng tau (oje') na'dabbung lapung gandeng namate. Lampami a'sobbu lapung pagandeng ri balla'na tau nanapasang angkua punna rie' anghojaa jako pauia di'. Battu toje'mi pulisi anghojai lapung pagandeng sumpae'a na injo patanna balla' a'bura-buraimi angkua: "Anre' kungngitte tau onjongpa isse' turie' salanna mae ri balla'ku." Injo pangngare'na pata balla' nunapa'sobbuia lapung pagandeng bura-bura katallasang ka natallasii tau. Angngurai pangnguppata gitte?

Lapaduli, Kajang



Ir. Andi Mahfud Mansyur Sultan CALONG BUPATI

A'SE'REKI NA KIKASSA' A'RURUNGKI AMBANGUNGI KAMPONGA



Drs SH.A. Abd. Mannan Syamsuddin, Apt, MSI CALONG PA'SAMBE BUPATI

SAJARANA TAU NULANIPILEA ANJARI BUPATI NA PA'SAMBE (WAKIL) BUPATI RI KABUPATEN BULUKUMBA

Rie' se're pasangang calong bupati na pa'sambe bupati ri Bulukumba, Ir. Andi Mahfud Mansyur Sultan siurangang Drs SH. A. Abd. Mannan Syamsuddin, Apt, MSI, arengna, iami inni nummakea lamoro lima sallo' ri pammileanga punna narapi'i tanggala 27 bulang annang. Naia injo nikuaya Andi Mahfud nianakang ri Bulukumba ri tanggala 28 bulang rua 1962, ana'na A. Mansyur Sulthan ampunna A. Sultan Dg. Raja Karaeng Gantarang, anjari sarjana se're taung 1989 ri pa'kulliang Universitas Tri Sakti Jakarta, ri hattunnami injo a'kullia maengi anjari pungkaha pa'se-re-se'reangna mahasiswa pagambara bangungangna Universitas Tri Sakti (Ketua BPM Fakultas Arsitektur Landscape Universitas Tri Sakti) sanna' lohena pa'se-re-se'reang maeng napatantang. Naia pangalamang jama-jamaangna lohe todo' nasaba' lohei parusahaang maeng napungkahai. Lalang politi' anjari pungkaha pa'tujung pa'kakkasa na apa-apanna pa'se-reang pungkaha wilayah Partai Amanat Nasional (PAN) taung 1999-2000. Inni hattua, anjari pungkaha daerah Partai Amanat Nasional (PAN) Bulukumba taung 2000-2005.

Pasangangna Andi Mahfud niarengi A. Mannan Syamsuddin nianakang ri Bulukumba tanggala 20 bulang annang 1950, ana'na Syamsuddin Daeng Opu Daeng Manangkasi, tautoa bahinena niarengi Hj.

SABA'NA TAU LOHEA NA A'RA' NAPILEI ANDI MAHFUD - ANDI MANNAN (LAMORO 5)

Lohe tau nikuta'ng na sanna' lohena tau allante mange ri pa'se-reang pambetaang (Posko Pemenangan) Andi Mahfud na Andi Mannan, angkua anggurai pangnguppata injo calong lamoro lima, lohei pangnguppa mingka inni nu-niukiria harupu' bungasa'naji arengna (inisial):

- 1. RS Bontobahari: "Kuittei A. Mahfud taunna a'tarima pau, macca pikkirangna, nampa pole Andi Mannan alusu geo' na paunna."
2. BC Bontotiro: "Nakke nubattua ri paratai jari ka partaiku natungkului. Inni lamoro lima, na memang balloji inni pasanganga, anre'pa gau' salana."
3. AW Herlang: "Injo nikuaya ammile, katojekangna ngase' rajja'a, anre' passaang, lohei nipasitimbang punna lammileki, nasaba' bija, singkampong, urang, kamaccaang. Mingka parallumi nipikkiri angkua andaki ammile nasaba' nittei tau maraenga. Nakke malling kupikkiri nampa kupile lamoro lima kamunnina."
4. MN Kajang: "Lamoro lima gampangji niurang a'carita punna nibattui balla'na, jari kulle kapang sallo' punna a'ra'i nimangei kantorona, anre'ja nalohe reme-reme'na."
5. JK Ujungloe: "Nakke a'ra'a ampabotti pikkirangku lambangungi Bulukumba, nasaba' inni lamoro lima nasareji tau lohe antama' a'pikkiri, nakke a'ra' to'maa aminnahang."

Andi Subaedah, kamanakangna Karaeng Dg. Matasa' Maengnga, ammarenta ri Kajang na maeng to'i anjari pungkaha ada' Kabupateng Bulukumba. Anjari sarjana se're taung 1977, sarjana rua (Master) taung 1999. Maengi anjari pungkaha bageang pa'bajuang ile (farmasi) Dinas Kagassingang Gowa 1979, kapala sub-dinas pa'pakaballoang pajama na bahang-bahang pa'pakalomo jama-jamaang kagassingang dinas kagassingang (Ka Subdin pengembangan tenaga dan sarana dan teknologi Kanwil Kesehatan Propinsi Sulsel) 2001-2005. Lohe to'i pangalamang pa'se-re-se'reangna (organisasi) nasaba' anjari pungkaha lombo (Ketua Umum) pasisekkokang sarjana pa'bajuang ile Indonesia (Ikatan Sarjana Farmasi Seluruh Indonesia) Sulawesi Selatan 2002 sanggenna kamunnina.

Nasaba' ballo batena najama jamaangna ri panjamaangna siurang balloi sippa'na mange ri urang panjamaangna maengi nisare tanra jasa panghargaang niarengna Satya Lencana Karya Satya 20 taung 1999. Bakti Karya Husada Dwiwindu taung 1989, Geladi Bakortranasda Sulawesi Wirabuana taung 1998, perak pemerhati Narkoba taung 2004. Kamaccaangna Andi Mannan na maengmi nikiring ansulu' ri pantarang kampong (luar negeri), iamintu ri Malaysia (Penang dan Kuala Lumpur), Australia (Sydney) na ri Singapura lannambai pa'pilajarangna.

- 6. AS Pa'rongo: "Injo Andi Mahfud gammara taunna, natala tinggi ati mae ri gitte ngase'."
7. GA Ujungbulu: "Urang-urangna calong lamoro lima anre' nanrenje punna geo'i na anre' to' pole nammassa."
8. WH Bulukumba Kota: "Anre'pa na ku' kulle ampa'tantui pileangku, mingka a'bojau tau lambusu."
9. HN Kindang: "Kupetta Bulukumbata gitte ngase'."
10. LM Gantarang: "Ballo ada'na Andi Mannang, nampa sombere taunna, talia angkua ri antama'napi calong pa'sambena Andi Mahfud."
11. DN Bulukumpa: "Ammile'a nunsareaa hatu lampikkirii Bulukumbaku, na inni kuitte Andi Mahfud, Andi Mannan nasarejaki kasampang lanjama injo jama-jamaanga."
12. ZB Rilau Ale: "Nakke rajja' caddia na anre'pa kupisa'ringii katojekangku numaenga nijanjiang, jari a'ra'a mae kunni nulangsareaa katojekangku. Ebara'na: katojekang a'bicara, a'pikkiri, na ngase'-ngase'na katojekangna rajja'a."
13. MY Mahasiswa: "Punna a'ra'ki a'paenteng pammarentaang ballo mange lambangungi Bulukumba, ia inni lamoro lima parallu nitimbang kaballoangna."

A'SE'REKI NA KIKASSA' A'RURUNGKI AMBANGUNGI KAMPONGA (Berastu Kita Kuat Bersama Kita Membangun)

Saba'na antama'na Ir. Andi Mahfud Mansyur Sultan calong bupati Bulukumba taung 2005-2010.

Andi Mahfud napai angkua tallu saba'na naantama' calong bupati ri Bulukumba iamintu:

- 1. Niparalluangmi lampakanai'i poko' pangnguppaang ballo lamange ri katallasang rajja' ri kampong-kampong nubattua ri linoa na nipana'i to'i kamaccaangna rajja'a lamange ri pa'pasarang pa'danggangang loloasaya.
2. Pammarentaang tangkasa, macca, nampa a'kullei nitappa'.
3. Nierangi Bulukumba anjari panjampaiang (pelayanan) nunijaminga ri sesena pa'kokong, pa'galungang, katallasang rajja' ri biring tamparang, pangalleang assele batu ri tamparanga na pabere lombo (industri unggulan).

Ia inni raha pa'mia'na Andi Mahfud, assele pa'kuta'ng mang ri kalenna.

Ante'i pakua pangnguppna rajja' lohea saba'na antama'ta calong bupati?

Tau lohea nutala naa'rakia pa'pakahajikang kampong na katallasang kulle kampong tala sanna'i napasilolongang, mingka nua'ra'a ballo katallasanga ri Butta Panrita Lopi tantumi natungkulua na napilei lamoro lima lomoro'ku punna pammileang bupati sallo'.

Apa-apa pangngaukang lahihaju nulanaitea mata lampakanai'i katallasangna rajja'ta nulaki-pungkaha?

- 1. Nipakalabba'i pasisambang pasara ansulu' kampong (ekspor) na pasara lalang kampong.
2. Niatori pa'se-re-se'reangna tau lohea na nipakakaddoro pa'doikangna rajja' caddia, pasiatorang haji' lalang pa'se-re-se'reangna tau lohea, nipakei pa'kakkasa pa'pakalomo jama-jamaang, pa'pakaloheang bibi' lamung-lamung, pa'pakahajikang assele lamung-lamung punna maengi nialle assele koko na galunga.
3. Nipasiurangi pambangung katallasangna rajja'a napammakeang pa'kakkasa pa'pakaballoang assele iapa nana'i

ballinna assele kokoa na galunga.

Saba'na a'ra'na Drs. H.A. Abd. Mannan Syamsuddin, Apt. M.Si anjari pa'sambena (wakil) Ir. Andi Mahfud.

Injo pasangangna Andi Mahfud lanjari pa'sambena sallo', Andi Mannan Syamsuddin arengna, alusu geo'na, alusu paunna, a'tarima pau (sopan) caritanna natala palla'i mange ri paranna rupa tau, nampa pole rie' kalabbiangna battu ri calong maraenga nasaba' kalenna battui ri kagassingang anjama, ia injo sala se'rena kalabbiangna. Andi Mannan anre' naborro punna a'caritai, na anre' todo' nabarani a'janji bura-bura, ia nunapaua ia to'ji nuna'kullea najama. Maengi rie' se're hatu tau a'kuta'ng angkua: "Ia injo biasa tau a'ra'a anjari pammarenta, pa'sambe rajja' mange ri DPRD, kapala desa na bupati caritanna na janji-janjinaji lohe mingka anre' bottina!"

Cobanna tau kodi pa'nyahanna inni Andi Mannan a'nassami larro nipangkuai a'pakua injo, mingka ata'muri-muri kaleji na nakua: "Rupa'na anre'pa'janji bura-buraku mange ri gitte ngase'. Naia nakke a'ra'ku lakupaui nukuisse'a, nakujamai nuku'kullea."

Punna nilangnge'-langngerei inni kajariang bicaraya injo rate, a'kullemi nipau angkua inni se're pasangang calong bupati na pa'sambe bupati nungnguppaya lamoro lima, parallu nipari ati nasaba' pikkirang na ada'na a'kullei nikambiang.

Ia inni raha pa'mia'na Andi Mannan, assele pa'kuta'ng mang ri kalenna.

Anggurai nua'ra' anjari pa'sambena Andi Mahfud?

"Injo Andi Mahfud napupatai pikkirang ballo. Nampa pole umuru'na lolo jari a'nassami angkua kaddoriji taunna, alasang a'ra'ku pole antama' anjari calong pa'sambe bupati nasaba' a'ra'a ampakahaji' kampongku Bulukumba. Ia inni na ku'pau kamua' injo nasaba' katallasangna tau lohea rahaiji, punna nipasitim-bangi pa'kulleang battu ri linoa (SDA) na pa'kulleang battu ri taua

(SDM) nurie'a, jari niparalluangi pa'tujung ballo lalang ambangungi sagala-galana nulampnai'i pa'kulleangna rajja'a. Assele lamoro se're nijamai na pahakka' ammake kamaccaang pa'pilajarang na pa'kakkasa pa'pakalomo jama-jamaang (IPTEK) nusirattanga."

Andi Mannan, a'ra'i napapinang ngase' tau lohea ri pa'tujung pambangung nunipa' kulle-kullei pangnguppaang maraengang, ebara'na: pa'tujung battu ri pantarang kampong (luar negeri), na anre' ta'lalo nirannu-angi pa'parutukang pangnguppaang nabalanga daerah (Anggaran pendapatan dan belanja daerah).

Iami inni pasangang calong bupati na pa'sambe bupati naa'raki ampakamajui Bulukumba "A'TIMBO, A'BAKKA', NAPA-KULLEI KALE SITUJU ATORANGNA AGAMAYA NA UNDANG-UNDANGA". Iami inni anjari pangngitte lerena (Visi) pasangang Andi Mahfud na Andi Mannan. Ri sesena lanrapi' injo rate pangngitte lerena napa'allu-angi anggukang (misi) iamintu:

- 1. Nipa'tarusui a'linrung rahang-angna syariat Islam na nigauk-angi lalang tallasa allo-allo, nampa pole rajja'a nikellaengi nagaukang na anre' nanipassa.
2. Nipana'i' pa'kulleang battu ri lino na pa'kulleang battu ri kale nuanre'apa nipakei mingka anjarii assele lamoro se're, lalang ri jama-jamaang rajja' ri pa'jukukanga, pa'tamparangang, pa'kokong na pa'galunganga.
3. Nipakanai' pa'kulleang nunijamayamo anjari pa'kulleang lamoro se're, ammakei bate beru (inovasi), pammakeang pa'kak-kasa pa'pakalomo jama-jamaang (teknologi), jari a'kullei a'panai' pa'kulleang lalang tallasa'na tau lohea, na nipapinang rajja'a ri desaya nasaba' rajja'a ri desaya nipanjari oloang lamoro se're pambangungang.
4. Nipahakka'i pikkirang pa'kulle batang kale (entrepreneurship/ jiwa wira usaha).
5. Nipana'i' pa'kulleang tallasa'na rajja'a battu ri pa'sikolaang na kagassingang.

PA'PASANGNA PASANGANG LAMORO LIMA:

- 1. Injo rajja'a tala a'kullei lombo siurang a'bakka' punna sangnging lanisuro kaleji annuru' a'tarru'-tarrusu punna anre' na nisarei kasampangang angnguppai katojekangna. Parallu kiisse' ngase' angkua gitte inni rajja'a rie' katojekangta lampikkirii kampong (Bulukumba). Jari maeki, na kimassing a'rurung-rurung.
2. Pa'paingaji a'kulle lakusa-reangki nasaba' sikalijaki ammile bupati na pa'sambe bupati lalang limang taung pammarentaang, aki ammilei punna talia a'ra' ati lambusu, aki to' ammilei nasaba' kasannangang sihattu, anre' sassa' lalang riolo, mingka ribokopi. Anre' to'mo matu-matunna paua angkua, anggurai na kupilei ianu na nukodi.
3. Sa'ra rajja' iamintu katojekang rajja' (suara rakyat adalah hak rakyat) siurang aki a'raki niukkuru ri linoa.
4. Mae saki katutui, lambangungi Bulukumba, punna nakanreja akkala haji' napa'mai' ballo kitijjo'mi lamoro lima sallo' punna ammileki bupati na pa'sambe bupati.
5. Iami inni lamoro lakipilea.







**TuKonjo Herlang**

**Beru Bunting**

Undangang (pa'keo' ri sesena tau la'pa'buntinga) mulai ri bulang Sappara saggenna antama' bulang Maudu rua Rabiul Alehiri 1426M, taung 2005. Lohe sura' pa'keo' pa'buntingang. Rie' todo' pa'keo' pa'buntingang sa'raji silantei, rie' sura' pa'keo' naerangi pagabena *pos giro*, na rie' todo' napake telepon.

A'nassami anre' ki'kulle allampai iangase' pa'buntingang, onjongpa isse' nulerea ri kampong maraeng. Rie' nikua bunting kodi, rie' todo' nikua bunting haji'. Rie' pa'buntingang biasaji, rie' todo' nusanna' lombo na roa'. Rua pa'buntingang beru anjari na a'nassami sanna' lohe undangang na tau allampai pole.

Ana'na Dr. H.A. Syahrir Sahib SPP MSc niarenga **Andi Buyung Saputra** sibili **Andi Andriang Tahir**, anjari ri allonna aha' tanggala karua bulang lima 2005 ri Gedung Sawerigading Bulukumba.

Ana'na Drs. H. Muh. Darwis MG (Hj. Rosmiati Gau), arengna **Andi Ardiansyas Darwis SE** sibili ana'na Drs. H. Andi Makkasau, arengna **Andi Herlawati Makkasau SIP**. Kajariangna tanggala lima bulang annang 2005 ri Gedung Sawerigading Bulukumba. Kajariangna pa'jagaangna ri bahinea tanggala appa' bulang annang 2005 allonna Sattu ri balla' lompoa ri Tanuntung, pa'nassaangna ri balla'na Karaeng Langnge-Langnge Andi Mappiwali/Karaeng Ago. Pa'buntingangna inni napangngarekii tau toaya bajji' makuntung, nasaba' nisu'ru'i, ri tangngana alloa nipa'tangngari pau haji', battui ri tutoana buru'nea. Natarimai ada' situru' bija pammanakeng.

Megawati, AM, Herlang

**Narapi' mi Ajjala' na Drs. Hajji Patajai Bin Benda**

Sitoje'-toje'na battuki ri Alla-taala, na amminroki mange ri ia; tallasaya lammatei; tunggalamaki nyaha lamatei. Kamateanga ri lino rahasiana Alla-taala. Tojengi bicaraya ri Alla-taala, napallabbangi nusikidia mange ri atanna. Singkamuami injo na kajarianga **Drs. Haji Patajai Bin Benda**, ri hattunna memang a'sikola ri SMP, naisse'i napahang bicaraya irate, saggenna naroko' memang kalenna.

Apa narokokangi kalenna? Pa'roko' lomoro se're pangngissengang. Pa'roko' lomoro rua gau' haji', ampe haji', tarima pau (*sopan*) mange ri paranna nipakatau. Pa'roko' maka tallu sambajang, puasa, sakka pitara, sakka apa-apa siurangang amala hajjina. Pa'roko' maka appa' napa'kigunai pangngissengangna mange ri paranna rupa tau, napa'sareang dalle'na sitangnga mange ri Alla-taala, napanjarii ana'na ana' *shaleh*. Pa'roko' maka lima, naerangi pangnga-a'rakangna iangase' gurua ri kabupateng Bulukumba (*ketua PGRI*).

Patajai Bin Benda mallingi anngajara bajung guru ri Bulukumba (SPG), nampa anjarii *guru bantu* ri SMKN1 Bulukumba. Riboko mae niangka'i anjari kapala SMAN Herlang. Anjoremi injo, niangka'i isse' anjari *pengawas* ri singkonjona sikola SMA kabupateng Bulukumba.

A'nassami naisse'i Patajai Bin Benda angkua naia kajariangku rua pa'sabakeng. Pa'sabakeng maka se're, rie' ammanngu rie' anrongku. Pa'sabakeng maka rua, rie' a'panjari.

Patajai maccai nahaju pa'kaluman-nyanganga. Barang-barang katallasangna napa'jului bahinenna, ana'na, naitte mata tau lohe, nasabbii pammarenta siurangang ada'. Apa saba'na nasangnging napau ri dallekangna tau lohea kunjo ri masigi'a

angkua: "Barang-barang singkamua tana, oto na ri maraengangnaya talia nakke pata, injoka Karaeng Alla-taala." Nakua ngase' taua: "Memang sirattangi bicaranna siurangang panggaukangna, saba' antere' rie' masigi' nibangung rie' to'i anjore, rie'i ri tau kaasi-asia, rie'i ri ana' kukanga."

Ri natora'na garring na'lampa ri Mangkasara a'tarile ri dottoroa, mingka dottora ri Mangkasara anre' nakullei najama garringna, saggenna a'lampai ri Jakarta. Ilalang balla' garring ri Jakarta nabattuimi ajjala ri tette' appa' ri subua allo aha' tanggala ruang pulo bulang lima 2005. Lohe bijanna/bija pa'tappangengna sanna' masse nyahana, nasaba' anre' naitte a'saraeng batang kalenna na nyahana. Allantei ri Bulukumba tette' karua ri bangnginna sanneng niahangangi tette' sampuloi ri allonna sanneng tanggala ruang pulo bulang lima 2005 ri Bira.

Patajai nasalai bahinenna niareng Sitti Sainara siurang ana'na appa', rua buru'ne rua bahine. A'bicarami Mappigau Samma pa'sambena bijaya. Maeng injo tunilabbiri'ta a'bicara Andi Patabai Pabokoi.

Rie' upa', Patajai Bin Benda nisarei pammantangang ballo masena Alla-taala. Aming! Mattaisseng, Herlang



**Kareba pa'buntingang**

Iangase' tau annganakanga ana' era-erana ri Karaeng Alla-taala: "Rie' upa' napiitteima haji' ana'ku, nasaba' batena kupiara nampami ilalang battang."

A'kulleki a'pilajara anjore ri tutoana ia rua Andi Sulaiman. Nasaba' rua buru'ne ana'na anre' namaeng rie' nilangngere ana'na kodi gau'na. Iaji napau taua kajariangna haji', ajara'na haji', saggenna pau-paunna, angka' bangkengna ammakei ada' situru' panggaukangna. Tutoana rua sikalabini anre' todo' namaeng nilangngere a'sa'ra susa ri ana'na.

Tubuntinga ri tanggala sampulo anlima bulang lima taung 2005, arengna **Andi Sulaiman Taiyeb A.Md.**, nulanabunting-ia anrengna **Harfisiah SH**, na pa'bunting-anga lanjari ri Bulukumba Kota.

Arengna tutoana buru'nea niarenga Drs. Andi Muh. Taiyeb, jamaangna kapala pammarenta ri kacamatang Herlang. Tutoana bahinea niarenga Andi Rualda Mappiwali, jamaangna anggota DPRD kabupateng Bulukumba. Andi Sulaiman ampu maka rua Andi Mappiwali Karaeng Lange-lange.

Kipammopporanga, Karaeng, anre' kisuroa na ku'gau' kale-kale.

Mattaisseng, Sappang Borong Herlang **Herlang:**

**Kajang-Kajang: Borong**

**Mansyur** ana'na Hamo' siurang **Satria** battu ri Ere Inung 25-5-2005

**Kajang:**

??? inaimo bunting iareka narapi' ajjala'na ri Kajang???

**Ana' Konjo Beru Nianakang**

**Kajang:**

**Tambangang: Pa'bentengang**

**Rahma** siurang **Rahmi** 13-2-2005

ana'na Sulfan na Nurmala

**Nurhaerani** 8-2-2005 ana'na Rabia na Igar

**Tambangang: Kalomporo**

**Musdalifah** 9-2-2005 ana'na Shuarni na Muh. Ikhsan

**Tambangang: Kaneka'**

**Harfia Mawaddah** 1-2-2005 ana'na Hasna na Safaruddin

**Lembanna: Sumalaya**

**Indah Suci** 20-2-2005 ana'na Nurlina na Rajamuddin

**Kareba Ada' ri Kajang**

Lohe buangangna pa'jagaang iareka pa'roa'-roakang, rie' pa'sunnakang, rie' nipasintinggi bulaeng, rie' hakeka' punna ana'-ana' beru nianakang, pangngurukang punna rie' tau bahine tianang bungasa, rie' todo' pa'kalombaang.

Kajariang pa'jagaang kalomba ri ampi'na pasaraya ri Ta'rongkokong Kassi' Kajang ri tanggala sampulo anngappa' bulang lima taung 2005, allonna Salasa tette' 10:00 ri ele'na saggenna maeng. Ana' nikalombaya ana'na niare'a Asri Mahmud na Syamsiah Mancanuri. Naia ana' nikalombaya rua sikali, iamintu **Jahda Mauliana Syam** na **Indra Bayulesmana Syam**.

Pa'pisabbiang ada' pa'kalobaang napacidongi pammarenta pammula kapala desa kalurahang, saggenna RT na napacidongi *pambantu PPN* na saggenna limgang masigi'na napanarie'i pungkahana ada' panggaukang pa'kalombaang. Ia anngatoroi romberombena kasangkakangna tunikalombaya sollanna anre'mo napa'karoddai kalarroangna batu-batuna situru' pasang ri Kajang.

Kuitteie rie' pa'tapi lompo, dulang lompo sangka' bonena, rie' dumpi cucuru lompo (labba), rie' dumpi bunga-bunga, dumpi laiya lompo (labba), kampalo lompo, kukusu dedde tinggi na ri pantarangangnaya rie' lappa lepa, rie' tau a'solo lipa', rie' todo' tau a'solo tedong, jarang na ri pantarangangnaya pole.

Kukuta'ngang ri pungkahana pa'kalombaanga angkua: "Punna anre' na nigaukangi a'kalombaya anngurui?" Pa'pihalinna pungkahaya: "Nagarringi." "Garring apa biasa?" "Ya, sangka' kagarringang napabattui, niarengi pa'kalarro bohe." Nakua pungkahaya: "Nikalombapi nampa gassing."

Megawati, AM, Herlang

**Bonto Bahari:**

??? inaimo bunting na nianakang iareka narapi' ajjala'na ri Bonto Bahari???

**Bonto Tiro:**

??? inaimo bunting na nianakang iareka narapi' ajjala'na ri Bonto Tiro ???

**??? Punna tania gitte ampantama' kareba, ante' pakua na'kullei nipallabbang ri paranta tau???**

Kareba nutojeng-tojenga nimirasai tunggala battu ri gitte, ibara'na kareba ri sesena kalassukang ana', pa'bakekaang, pa'sunnakang, pa'kalombaang, pa'buntingang, kamateang. Punna rie' karebanta, kipari karattasa nampa kipakunjoi ri kantoro cama'ta . Kareba nunitarimaya iamintu nunjaria ilalang tallung bulang nullalloa.

**Tau sara ri pa'buntingangna**

Kajariang pa'buntingangna ana'na iLahya Ruki, sikali napa'bunting rua, iamintu sitau buru'ne arengna **Ilyas Lahya, SH**, **Anunabuntingia** niarengi **Verawati**, na sitauanga bahine arengna **Faisah Lahya SE**, **numbuntingia** arengna **Yuri Sakaputra Marud Dani SE**. Allo kajariang rie' ri tanggala tuju bulang rua 2005.

Injo bija-bijanna iLahya siurangang bija-bijanna bahinenna niare' iSonra Sase Lahya. Sanna' pammujina mange ri Karaeng Alla-taala, nasaba' anre' mangkaja kajariang anjama riolo, a'bacadoang ri boko, battuangna a'pakasiri' bija, na'pammana' pau-pau ri batang kalenna.

Na injo ri alloa a'cidong bunting lohe tau anngarrang, taliaji bija-bijanna, manna tau battua ri Herlang. Punna nikuta'ngang angkua anngurui na

sikarrang-karrangi taua, pa'pihalinna: "Massei nyahana anngititei ana'na cidong bunting na ammanna kodong matem. Here-herena to'i isse' battu ri Alla-taala, ana'na tangnga nirapi' ri ammanna ampa'buntingi."

**ILahya Ruki BA**, ta'lalo nipujina ri rajja'a hattunna cama' ri Herlang, pangngerang nyahana situru' bahinenna, sirattangi angka' paunna ada' pa'bicarana mange ri taua, tangnga napasimmaraeng tau lompo ana'-ana'. Lohe kamajuang pambangungang a'jari mata-mata annanro pangngur'rang ri sesena tuma'kamponga ri Herlang. Anjarii cama' ri Herlang ri taung 1984 saggenna taung 1989. Garring nasabaki mate naerangi dottoroa rarana tinggi. Mate kodong ri bulang annang 2004.

Andi Mattaisseng, Herlang

**A'ra'ki annguppasura' kareba Bulu' Kuuppa bulang-bulang?**

Sampang ansulu'i isse' sura' kareba **Bulu' Kuuppa**, nipalante ri limanta kedde'. Pakunni bateta: pa'nassaangmi raha mae arengta na pammantangangta pole.

Nampa nisare ri paerang sura' karebata iareka nikiring ri SKBK ri Kotak Pos 1419 Makassar 90014 iareka ninanro ri kantoro cama'ta.

Arengta

Pammantangangta (antama' to'i areng dusung, desa, na kacamatang)

Pa'nassaang maraeng, ebara'na "balla'ku ri bokoangna SD 2736" iareka "ninanroanga na nibanyara ri kapala dusung Ere Dabbung."

Bunga'-bungasa'na punna kitarima sura' karebata **Bulu' Kuuppa** kibanyara memangi 2000 rupia. Ri bokopi mae punna ansulu'mi pinggappa' sihang **Bulu' Kuuppa**, nampamaki a'banyara bulang-bulang.













## Kalabbuangna pa'bajuang lopia ri Tana Beru

Ri Tana Beru lohe jamaang najama tuma'kamponga, iamintu padanggang kaju bajang, pabalu' juku', pabalu' bundu'-bundu' ri pasara, iareka pajama pammarenta, jamaang koko, na a'bajua lopi (iareka pau Mangkasara'na *tu'pareka biseang*), pajakkala juku', paerang oto, paerang tallu roda, paerang oje', pajama balla', pajama batu, na loheiji pole maraeng.

Tunjamaya lopi biasa to'i nibattuangi tau panrita lopi iareka tupore a'baju lopi. Pakarammula ri hattunna Balanda sanggenna inni alloa loheiji tunjama lopi. Battu ri bohe-bohe na naung ri tutoana sanggenna mange ri ampunna. Jamaang lopiji najama napakatallasa ri katallasangna, napake angngongkosi ri sikolana ana'-ana'na. Lohe tukalumannyang battu ri panjamaang lopia, lalang to'mi intu tubattu ri Ara, ri Munte, na tuBiraya. Onjongpa isse' kunni-kunni lohemi pole tubattu pantarang pa'rasangeng (*turis*) ammalli lopi sikajja'-kajjalang ballinna. Nasaba' napake to'i a'danggang a'lurang-lurang, simbansana battu ri Bali ammiti' ri tamparangna Indonesia siurangang tinggina pa'sehana. Biasa to'i pole tubattua ri Takalara iareka tuGalesong iareka pulo-pulona Pangkep ammalli lopi ti Tana Beru. Maraengangna injo pole biasa to'i tuBulukumba, tuSinjai, na tuBone mae ammalli lopi ti Tana Beru.

Sitoje'-toje'na lohena tau anjama bantilang ri Tana Beru sanna' lohena. Mingkaka sitangnga ansulukang kampongi nasaba' adde'mi sanna' a'matu-matu panjamaang lopia ri Tana Beru. Punna nirekeng-rekengi lohena larie'i kapang labbi sibilangang amma tau. Punna nirekengi iangase' ana'na na bahinenna larie'i kapang tallung bilangang tau. Punna jamaang lopiama panra' anre' na nijampaangi ri pammarentaya, langgurami tau lohea, turie' ia tallung bilangang tau?

Kaju nunapakea anjama lopi riolo iamintu kaju na'nasa na jati battu ri Tana Beru, na battu ri Herlang iareka Kajang siurang todo' pole ri Tiro, nasaba' loheiji kaju na'nasa siurang kaju jati, nampa pole sempoiiji balinna sikubi'. Jari sannangiji nyahana tu'bajua lopi. Lohe tubattu ri Mangkasara, Takalara a'suro a'baju lopi punna nai'i juku'a ri bulang kallanganga, nasaba' kajjala ballinna juku'a na sempoiiji ballinna lopi ri Tana Beru ta'sibatu lopi. Jari lomba'-lombaengi nai' mae punna maengi a'balu' juku' ri Mangkasara. Punna anre' na'suro anjama ri Tana Beru biasa to'i nakeo' naung ri kamponga lanjamaangi lopinna. Natanggong iangase' ongkoso'na, a'pammula ri ce'lana sanggenna kaluru' Surya Gudang Garamna. Sanggenna lohemi pole tuTana Beru a'bunting naung ri Takalara iareka ri pulo-pulona Mangkasara a'palabbang pa'bijaeng pantarang kampong Tana Beru.

Mingka konni-konni anre'mo panrannuang pajama lopia ri Tana Beru. Sanna'mi sisalana riolo nasaba' lohemi tau anjama lopi mingka sanna'mi kurangna tu'suro anjama lopi. Lohe to'mi tau ansalai jamaang lopia mange ri jamaang maraengangna lopia iareka ansulukang kampong anjama lopi ri Batu Licing, Kalimantan iareka ri Kendari iareka ri Sorong iareka ri pulo-pulona Irian Jaya. Lohemi tau a'nganro sikidi pangnguppaangna, anre' naganna' ri pangnganre, labbi-labbipa ri pangngongkosi sikolana ana'na.

Apa saba' na a'pakonjo? Nasaba' nai'na ngase' balli-balliang nulanipakea ri lopi siurang pa'kakkasa lopia. Kajjala kajua nasaba' sanna' sikalimi kurangna nibalukang ri Bulukumba. Labbusumi kaju bajung lopia kamuaya kaju na'nasa, kaju jati ri Bonto Bahari, ri Tiro, ri Herlang, iareka ri Kajang, maeng ngase'mi nitabbang nampa anre' nalamungii pole amminro. Jari kaju nipakea ri Tana Beru, nubattu pantarang kampong mami. Nampa pole taliame kaju jati iareka kaju na'nasa, mingka kaju nomor ruaya mami, kamuami kaju kandole. Rie' to'ja kaju nomor se're mingka ballinna taliapa to' kajjala'na se'rea kubi', onjongangpa pole kaju bassia nisahala nihalli sipappa'.

Maraengangna kajua, rie' pole napa'nganroang pajama lopia, iamintu pa'kakkasa lopia. Kamuaya kancing, gala-gala (*damara*), parada, ongkoso panjama sanna' sikalimi kajjala'na. Onjongpa isse' la'patumbu to'mi rente, battuangna nasima koko (*pajak tanah*), pajama lopia kodong, pila' anre'mo panrannuang ri sesena katallasangna ana'na iareka ri bahinenna. Punna anre'mo najampaangii pammarentaya, kahajikangna pajama lopia sanggenna limang taunga lanidallekang apamo kajariang labattu. Nasaba' anre'mo kasappongang/nausse' napiamu ri kalenna. Sitoje'-toje'na inni pasilolongangna, parallu nalima pammarentaya ri kabupateng nahojaang kahajikangna.

Punna nipikkirii, sitoje'-toje'na inni pasilolongangna, maengmi na'kulle-kulleang pammarentaya ri kabupateng, mingkaka a'rakiji nipikkiri pole kalabbuangna. Ante' pakua na iangase' kasangkakangna pajamata kulle nipa'rie' ngase', siurang sempo na kulle nahalli pajamaya.

Sitoje'-toje'na sitaung allalloa iamintu taung rua sabbu angngappa', sambe sidongangna bupatina Bulukumba iamintu Dr. H. Andi Syahrir Sahib, M.Sc. battumi ri Irian Jaya nahojaang kalo'morangna kajua antama' ri Tana Beru. Battu to'mi nahoja kampong lohea borongna ri Irian Jaya siurang ri Sulawesi Tenggara, nubiasaya napangngallei kaju bajang padanggang kajua. Maengmi sitappuki bicara siurang pammarentana Irian a'rurung pammarentana Tenggara angkuaya anre' nisukkarii; alleangna kajua ri borongna ngase'. Iareka anre' nipakasusai erangangna antama' ri Tana Beru, assalang rie' ngase'ji sura'-sura'na. Injo riolo ri anre'napa na iSBY, presidengta konni-konnina, ammentana biasa punna anre' nabuccu'/na'banyara cokka doe' anre' nilappasangi. Mingka konni-konni anre'mo nasanna' ba'lalo terasa. Nasaba' malla'mi kapang ri presideng SBY.

Manna kamua injo parallu todo' nipanjari haji'i borong jati na borong na'nasa ri Bulukumba, iamintu kacamatang lohea borong jatina siurang borong na'nasa'na riolo. Punna parallui a'samaturu' ngase'i mange ri kampong-kamponga iangase' pamma-mentata a'sare pau-pau iareka sa'ra-sa'ra haji' mange ri tuma'kamponga. Pammula ri bupatina, pammarenta kapala borong, pammarenta kapala pa'kokoang iareka pa'galungang iareka kapala kacamatang na'rurung kapala desaya. Nakeo' ngase' to'i kedde' tuma'kamponga a'rurung a'samaturu' a'lamung kaju jati na kaju na'nasa.

Kahajikangna punna a'samaturu'ki anjama, a'lamung kaju jati iareka kaju na'nasa iamintu lomo iareka ringangi nisa'ring jama-jamaanga. Nasaba' massing rannuki, anre' tuisisala-sala iareka a'bese'-bessere, kamua olo'-olo'a. Kahajikangna maka rua iamintu lohe borong ri Bulukumba a'keo' bosi mae nanjari lamung-lamung bataraya iareka maraengangna. Punna bakka'mi jatia iareka na'nasaya na'kullemi sirakakang lima, a'kulle to'mi nitabbang nibalukang nipanjari lopi iareka balla'. Haji' ri pamma-mentaya, ammajiki ri tuma'kamponga, ri pakokoa, iareka ammajiki ri pahaju lopia.

Maraengangna injo pole pammarentaya parallui to'i napikkiri ante' kamua batena napa'bojaangi pahalli lopi iareka tulammalli lopi ri Tana Beru. Nasaba' kurangmi pahalli lopi. Punna rie'naja pale' pahalli adde' isse' nabanyara ngase' ballinna lopia. Uppana to'pa injo lopi napa'banyarang, punna pale' rie' nauppa gaena. Manna injo naungpi ri Galesong. Iami injo kedde' naparallu nihaju pasisambungang haji' pajama lopi mange ri sambalu'na, iareka sibalikangna sihajikiipi sambalu'na mange ri pajamana.

Sitoje'-toje'na parallu to'i nihaju pasisambungang haji' iareka pa'samaturukang para pammarenta kabupateng Bulukumba a'rurung pammarentana tuparallua ri lopi iareka tulohea borong kajunna.

Pammarentana Bulukumba parallui a'keo' antama' mae padanggang bakka' ri Bulukumba iareka ri Tana Beru la'paenteng pa'danggang bakka' nu'kullea a'tarima pajama tuTana Beru iareka tuBulukumbaya. Kamua kedde' pa'danggang nu'kullea napa'matu-matu sahu' kalukua ri Bonto Bahari, iareka sesa/karosang, pa'garagajianga (pa'somelanga) a'kulle nipanjari mejang pa'pilajarang *merk ligna* napake ana'-ana'a massing ri balla'na. Iareka nipanjarai ganteng balla', nipanjari pupu' a'pakaso'mo' lamung-lamung. Kulle to'i padanggang bakka'a angngongkosi pa'lamungang kaju jati iareka na'nasa. Nampa ia to'mo ambalu'i siurang tuma'kamponganga.

Punna lohemi jama-jamaang beru nipaenteng ri Tana Beru, kulle to'mi pajama lopia a'boja jama-jamaang maraeng lanapa'tallasi pammanakangna, iamintu ana'na siurang todo' bahinenna. Injo ana' buru'nea kulle to'mi a'parua tallu jamaang. Rua tallu to'mi pantamakang doe'na tuTana Berua sanggenna punna nipangngerai sima adde'mi holang nyahana, bussang atinna a'moro-moro. Kamponga sannang anre' tu'baji'-bajingang nasaba' turie' ngase' jamaangna, turie' ngase' todo' siri'na natanang ri rupanna. Sannang tuma'kampong sannang todo' pammarentaya, kurangmi ampakasusai allo bangngi. Tuma'kampongang rie' doe'na napahalli ri kaparalluangna allo bangngi, pammarentaya sannang nyahana tarima gaji battu ri simana tuma'kamponga. Iamintu pammarentaya na niarengi pajampaangna tuma'kamponga.

Safaruddin, Bonto Bahari, 01/05



Rie' tau battu pantarang pa'rasangeng, iamintu battu ri nagara Parancis, a'paenteng balla' na ammantang-mantang ri Tana Beru pa'tujungna a'suro a'baju ruang batu lopi. Iangase' pa'kakkasa siurang kaju nunapakea nusanna' ballo na kajjala ballinna. Balla'na bedde' balla' situru' balla'na tau Tana Beru, na kaju jati napake sibatu balla'.

Nassami lohe tau rannu ri rie'na tau bansaya injo, nasaba' rie' jamaang lopi isse' najama napa'tallasang. Rie' todo' nauppa tau balu'a battu ri ballinna kaju nunapakea ri lopi ruaya siurang kaju jati nunapakea ri balla'na.

3. Pa'bica'-bicaraang Tallu Basa

(mingka se're pammahangang)

Anggarisi

- A: What is the English for "Lante'ko mae?"
- B: In English we say "Where are you going?"
- A: May I say that to just anyone?
- B: Usually in English we only ask a person where he is going if we know him well or have a specific purpose for asking.
- A: Oh, we Konjo like to ask a person where he is going just to be friendly.
- B: Yes, but in English it's not polite.
- A: Thanks for telling me that. I don't want to be considered rude.
- B: Any time. It's always good to learn new things.

Malaju

- A: Apa bahasa Inggrisnya kalau "Lante'ko mae?"
- B: Kalau bahasa Inggris dikatakan "Where are you going?"
- A: Apakah saya dapat bertanya demikian kepada siapa saja?
- B: Biasanya dalam bahasa Inggris kami hanya bertanya begitu kalau kami sudah kenal orangnya dengan baik atau kalau ada maksud tertentu.
- A: Begitu, ya? Kami orang Konjo biasa bertanya supaya dianggap ramah.
- B: Ya, tetapi dalam bahasa Inggris itu dianggap kurang sopan.
- A: Terima kasih atas penjelasan itu. Saya tidak mau dianggap kurang sopan.
- B: Kapan saja. Bagus juga kalau kita belajar sesuatu yang baru.

Konjo

- A: Apa bicara Anggarisi'na punna "Lante'ko mae?"
- B: Bicara Anggarisi'na iamintu "Where are you going?"
- A: A'kulleja a'kuta'nang pakunjo ri iangase' tau?
- B: Punna bicara Anggarisi tau nubiasaya nikuta'nang iamintu nukiuranga siisse' iareka punna rie' toje' kaparalluangta angngisse'.
- A: O, pakunjo? Nakke ngase' tuKonjoa biasa a'kuta'nang ri tau allalloa sollanna naisse' angkua asomberea.
- B: Io, mingka niare'i kurang haji' ri tu'bicara Anggarisi.
- A: Lompo rannungku injo ka kipau-anga! Andaa niare' tau kurang ajara.
- B: Tala angnguraji. Haji' todo' punna a'pilajaraki nuberu.

Kipakemi kasampangang haji' inni a'pilajara basa Anggarisi? Maengi kiapele pa'bica'-bicaraang maka se'rea na maka ruaya? U'rangimaki angkua larie' pa'rannu-rannu nauppa tummuntulua lamoro se're na rua na tallu angngapele sampulo pa'bicaraang basa Anggarisi. Na inni pole, inai-nai angngapele iangase' pa'bicaraanga langnguppa kamaccaang ri sesena basa Anggarisi nusanna' parallua ri sibatu lino.

U'ranghi todo', punna rie' pa'bicaraang battu ri gitte iareka na battu ri gurunta, palante sai ri sura' kareba **Bulu' Kuuppa** na kinanro ri kantoro cama'ta.

**Maemaki angngapele!**

**Tappu-tappu palang**

**Lappara:**

1. nunigaukang kedde' pillima siallo
2. sibuangang attappere nunipakea punna rie' acara
3. basa malaju angkua di
4. anre' nasala
5. basa Mangkasara angkua boli'
6. basa Anggarisi angkua mango
7. pa'buntingang sibuangangna
8. basa Malaju angkua dahi
9. nunikeo' ammaya punna tuhusegna karaeng
10. anunna inru' nunihajua pa'sarring

**Naung:**

1. nu'kullea anghilo-hiloiki
2. anre' nalere
3. labbi raja
4. tanja'na raung na ruku' (/moncong)
5. Sallang niare' sala se'rena
6. nunipakea punna angnganreki
7. si \_\_\_\_\_ bua kaluku
8. sibuangang poko' kaju nulohe matu-matunna
9. biasa napake tedong iareka capi punna rua anjama
10. nakke niare' \_\_\_\_\_ ri kakangku
11. nikua ri sesena buru'ne punna sanna' haji'

			2P			4C
		1B	O	3N	T	O
	2S	U	L	A		
		3L	E	R	E	
		A		A		5A
	4K	E	K	K	E	
		N		A		D
5L	A	G	6O			O
			6P	A	D	A
			A			

Pa'pihalinna tappu-tappua nurie'a ri sura' kareba rioloa.

			2		3	4			5
	1			6					
			2						
4							8		
			5						
	4								
6					8				11
			9						
7						10			
9					10				

**Balasa'na Taburaya**

Carita lakupaua sinampe' talia bicara nihaju-haju, talia to'i tau maraenga maeng anggaukangi, mingka carita lakupaua maeng minto'i kugaukang. Inakke anggaukangi, inakke todo' ampisa'ringi balasa'na. Kajariangna anjarii pangngu'rangi lompo mae ri kalengku. Anre' nama'ring tala kuu'rangi, ka saggenna inni alloa riekiji pa'bate-batena ri kalengku. Anre' na'kulle ta'sala saggengku mange ri pammaseku.

Injo hattua a'sikolaija ri sikola SR arengna ri Kassi' taung 1952, allo sanneng. Lerena balla'ku mange ri sikolaku, labbi annang kilo, ka sikolaku ri Kassi', na balla'ku ri Tammalaju, Kassibuta dusingna kamu'-kamunnina. Anre'pa nalohe dongkokang pada kamunnina, jari a'lingkaji taua punna lampai a'sikola, iareka punna lampaki a'pasara ri Kassi'. Kullemi ninaha-naha sikura lerena kulingkai siallo, ante' to'mi pakua mangngangta punna allo-allona nigaukang.

Se're hattua allo aha'i situjuang to'i ambuana kadienga. Lohe pakalahaki mange kare'-karena ri tujunna kadienga. Nakke mange to'ma a'kare'-karena siurang pakalahakia, ka ballo kusa'ring a'kare'-karena angngambi'-ambi' kadieng. Ambua'mi ri naha-

nahangku angkua ammuko anre' ku'lampa sikola, jari ruang alloa anre' kumangngang a'dakka. Narapi'i karahie' siitema urangku sipa'sikola'laangku ri Kassi', kupauangmi angkua, "Ammuko punna nitappu arengku ri sikolaya, pau mami angkua garringa. Ka mangngang kaleaa kusa'ring, anre' kukullei a'lampa sikola." Nakuamo urangku, "Io, mingka punna sallo' mangngang to'a pantama' garring to'a."

Ammukoangi narapi'mi allo sanneng, anre' toje' ku'lampa a'sikola. Nakuta'nanga puangku angkua, "Angngura na anre' nu'lampa sikola?" Jari ganna'mi rua bura-buraku. Bungasa'-na kusuroi urangku a'bura-bura, nampa maka ruana kubura-burai pole puangku, ka nuanre' kumaeng a'paramisi na kukua maenga a'paramisi. Tinggi-tinggii alloa nakuamo kakangku nutianang bungasaya, "Mange sako pangngalleanga kadieng." Tappa' kukadoimi ka nuia minto' injo kadienga kunaha-naha na anre' ku'lampa sikola, kusuro pantama' garringi kalengku ri urangku. Ka ia minto' injo kunaha-naha, na nisuro minto'ma pole, rannu kaleama kusa'ring. Kukeo'mi kakangku se'reanga arinna injo nutiananga a'lampa angngalle kadieng, rannu to'mi

**T appu-T appu**

- ◆ Punna niu'rangii, anre' nierangi, punna nikaluppai, nierangi amminahang. **Apaya?**
- ◆ Punna bangngii, labbu uhu'na, punna alloi a'kulu-kulu bebbe'i. **Apaya?**
- ◆ Rie' sangnging a'lampana, mingka ri anre'napa na'lampa namae. **Apaya?**

pole ka sanna' todo' nangaina kadienga.

Nibodoi caritaya. Lampama a'rurung kakangku mange ri kadiengna boheku, tarrusuja mange angngambi'. Anre'ja kungngera rolo', ka nunapalaloang minto'jaa angngalle punna inakkeja. Inakke angngambi', kakangku nukururanga ia rajaji anrapping. Ka lohe buana adidi na bani-bani pole ri tangkenna, jari tappa' kupuppuluji nampa kupilei nudidia kukanre. Ia numata-mataya kubuangangi naung kakangku. Punna naku kakangku, "Angngura na numata nualle?" Kukua-mo, "Anre' adidi." Ganna'mi pintallung taburaku, ka kubura-buraimi pole kakangku ka anre' nakullei angngambi', ka tangnga nikellai angngambi' ri puangku ka bahi'-bahinei.

Lohemi kadieng kukanre, nakuamo kakangku, "Angngallemao nulani-erang amminro." Jari a'bojama numbani-bania ri ampi'ku nulompolompoa nahaji' didina, ka lakuerangangi kakangku nu'suro angngallea kadieng. Rie'mo sitangke kuitte ambani ri ampi'na pangkana, mingka rajjngi nialle ka rie'pa kedde' pa'su'ru naita' niuppa. Mingka lakualle to'jia ka ballo kaleai kuitte didina. Ri ampi'na tangke kupa'lisakia rie' todo' tangkenna mate. Tala kusa'ring na tappa' kulisa' tangke mate na kudappo'mo naung, anre'mo kungngu'rangi. Iapa isse' kungngu'rangi maengmi ta'lesang alloa, kunjoma ri balla'na boheku pataya kadieng. Kuittemi lohe tau anrumunga, kuitte to'mi amma'ku angngarrang ri ampi'ku. Rie'mo kulangngere tau angkua, "Tallasaji ka nasungkeji matanna."

Nampami kunaha-naha angkua angngura kukunni mae, na nungngambi'a kadieng sumpae', kupisa'ringi to'mi pa'risi ri ulungku. A'dappo'a kapang ri kadienga. Anre'pa nahaji' pangngu'ranginku kusa'ringmi nibule'a amminro ri balla'ku. Ammuko-angnapa nampa haji' pangngu'ranginku, nipauang to'ma angkua a'dappo'a ri kadienga, loko'i lattangku natijjo' poko' sarru-sarru numaeng nitepasa sikali. Polong to'i pole gicingku sipappa', gigi ri dallekangku. Kukarambang ngase'mi injo nunapauanga taua. Kukuamo naha-nahangku, iami inni balasa'na punna taburai taua, ka lohe ta'lalo tau kubura-burai. Kubura-buraimi gurungku, kubura-buraimi puangku, kubura-buraimi to'i pole kakangku. Iangase' tau labbiri'ku, kubura-buraimi ngase'. Labbi sampulo allo anre' ku'lampa sikola. Lohemi karugiangu, garring toje'ma pole.

Kuukirri caritaya, bara' a'kulle anjari pangngajari ri kalengku, na'kulle todo' naalle tau ambacayai inni caritaya. Punna rie' tau anre' natappa' ri caritangku inni, maemaki angngitte bate loko' ri lattangku. Na gicingku rieki to'ji, anre'pa nasappo.

Sikua'ji injo caritangku numaenga kugaukang natala maeng tangnga kuu'rangi. Muhammad Syurkati 10-1990, Malleleng, Kajang

**A'lila padalle':**

Punna rie' tau anre' na'kulle nipatantang bicaranna; inni alloa maraeng, ammuko maraeng.

**Ringang lima:**

1. Punna rie' tau caradde' anjama-jama na hebbere maeng.
2. Punna rie' tau hebbere anrabung iareka anjaguru, iareka nahebbere napitabai lima paranna tau.

## Tau nikalassukang rua katauangna

[Amiluddin, Tana Lemo, Bonto Bahari]

Rie' ri kampong Tokambang kalurahang Tana Lemo Bonto Bahari ri bangnginna Juma' tanggala sampulo angkarua bulang rua 2005, na rie' tau nikalassukang ri anrongna iamintu anrongna niarenga Bongko na buru'nenna niarenga Kisman. Na jamaangna Kisman iamintu papekang juku' na bahinenna jamaangna iamintu pabalu' juku'.



Naarengna injo ana'na niarenga iAso' na injo iAso' rie' kalabbiangna na sikuntu tau ana' rie'a ri linoa. Na apa injo kalabbiangna? Iamintu rua katauangna, katauang bahine na buru'ne.

Na sungka'namo nilassukang injo iAso' anre'mo na'lampa-lampa mange anrongna a'balu' juku' na buru'nenna anre' to'mo na'lampai ammekang juku' nasaba' injo iAso' punna a'jambang sangnging ammarrang-marrangi punna lansulu'mi tainna. Apa injo napakunjoi? Iamintu tala rie' a'rungang tainna.

Ri hattunnamo naisse' ngase' taua massing a'lumbaengmi mange anturungi balla'na Kisman na sikuntu tau turunga tala rie' tau tala ta'bangka' angngittei nasaba' nampanna angngittei sungka' taunna na iami inni napangngitteangi kakoasaangna Alla-taala nakua tau sikuntu tau turunga.

Na injo tau turunga rie' todo' pole pagabena kalurahang Tana Lemo na apa injo nakua ri antara'na pagabena? Inni kullei nipangneraang sumbangang ri pammarentana Bulukumba, iamintu ri bageang *sosial*, nasaba' pangngakuangna doktoro'na tumpansulu'i iAso' kulleji ballo punna hebberei nitoppa' ri Bulukumba.

Ri sesena tau toana inni ana' anre' na'kulle a'banyara doe' pa'toppakang, na kuerai sikuntu pabacana sura' kareba basa Konjo barang a'kullei massing nitulung siku'-sikura a'ra' kitulungi inni tau toana.

Na injo iAso' saggenna inni bulanga anre'pa namaengi nipa'toppakang, nasaba' tala ganna'pi doe'na. Punna niitiei iAso' pila' katambaangi bakka'na na ta'pinahang todo' pole bakka'na katauangna, na anre'pa kullei a'tompang na ammesu'.

Ri hattuna allo sanneng tanggala rua bulang limaya inni 2005 maengmi nisare sura' pa'nassaang ri pammarentana Tana Lemo. Na nisare pole sura' JPS battu ri balla' garringna Tana Beru, nasaba' injo sura' lanaerang mange ri doktoro'na Bulukumba napiitteang. Tau toana iAso' anre' na'kullei a'banyara doe' pa'tappakang ri doktoro'a.

[Ri bulang lima nanjari nitoppa' lapung ana' injo ri balla' garringna Bulukumba. Anre' na'kulle tappa' nipakahaji' iangase' rolo', mingka nunapakahaji' pansulukang tainna, iamintu nikalibbongi battangna nampa nijempangi na pa'kakkasa nu'kullea nitimba' punna la'jambang. Sukkurui tutoana iAso' ka anre'mo nasangnging ammarrang-marrang punna lansulu' tainna. Rie'mo a'rungang tainna.]

U'rangimaki! Sura' kareba Bulu' Kuuppa  
Tu'bacaya tungngukiri'na todo' pole

Ri Papinjing desa Possi' Tana Kajang nakabattuang pa'sambe (akkele/*wakil*) bupati Bulukumba Dr. A. Syahrir Sahib, iamintu ri allonna juma' tanggala sampulo angkarua bulang rua taung 2005, na rie' to'i pole cama' Kajang Drs. Abd. Jalil siurang Kapolsek Kajang Iptu Ferdy Irawan.

Nanitarima ri rajja'a ri Possi' Tana lohena tangnga ganna' labbi ri ruang bilangang tau na ilalangnami kapala desana iamintu Sudirman Pasoba, siurang ri iangase'na kapala dusung ri sibatu desa Possi' Tana.

Naia matu-matunna nakariekanga pa'sambe bupati iamintu sipa'nassaang ri pa'bajuang pa'se'reang ana'-ana' pa'rongo (*pembentukan pemuda kreatif*).

Naia numpungkahaiai pa'se'reang pa'rongo inni iamintu Wahidin, amuru'na ruang pulo angngappa' taung, na pa'sambena nikua Pendi.

Na apa matu-matunna na nahaju inni pa'rongo *kreatif*? Iamintu bara' kamua-

napa na anre' na'kulle a'sara'-saraeng, na bara' a'kullei napakahaji' kampongna nasaba' ana' pa'rongoa iamintu paerang pa'pakalabbu ri kamajuangna katallasang lanidallekanga.

Pa'pasangna pungkaha ana' pa'rongoa Wahidin angkua: "Anre' na'kulle taunna a'pada parring nipuea, angkua rie' nilisa' na rie' todo' niangka'. Battuangna pammarenta anre' na'kulle a'pasimmarang tau iareka kacamatang na maraengangnaya."

Bicarana pa'sambe bupati Syahrir Sahib nakua: "Lohe tau angkua: 'Antama'a bajung kapala daera Bulukumba,' mingka injo tauaji angkua, naia inakke nampamo a'pa'tujung. Na iajia punna gitte ngase'mo ansuroa angkua, 'Antama'maki,' battuangna nampamo lantama'."

Na napihalimi rajja'a angkua: "Antama'maki, nasaba' nampanna rie' bajung kapala daera tau battu ri Kajang. Akimo a'tajangi angkua taung 2008pi mingka inni kasampang lombo mange ri gitte."

## Pa'tandingang a'caturu

Ri tanggala salapang allante tanggala sampulo bulang rua taung 2005 na nagaukangi ri Mallombong desa Tugondeng Herlang iamintu a'tanding a'caturu. Na napantamaki tau a'tanding lohena limang pulo tau, nabattu ri lohe todo' kampong.

Na inni panggauganga natimba' tappa'i kalenna Sekda Bulukumba Drs. H. Mappigau Samma, MBA, MSi, nuiami katua pa'geokang allo jarina Kabupateng Bulukumba.

Naia matu-matunna nigaukangna inni pa'tandinganga iamintu:

1. Amminahangi a'palante na'pakaroa' allo bungasa anjarina kabupateng Bulukumba.

2. A'piitte mange ri ana'-ana' pa'rongoa siurang ri tau tabbalaya ilalang pa'pakalompona pa'pakarenaang caturua.

3. A'baju pa'se'reang iareka pasiurangang pa'rongo na tau tabbalaya, manna ilalang kampong manna pantarang kampong.

4. A'baju pa'roa'-roakang nu'kullea napisa'ringi tau tabbala lalang kampong iareka pantarang kampong.

5. Annambai kalereang iareka katinggiang pangngisse'na ana' pa'ronga ri sesena pa'se'rese'reanga.

Na modala napakea a'balanja ri sikuntuna pa'rannu-rannu na maraengangnaya iamintu labbi tangnga ganna'na lima juta rupia, na tallung buangang pa'tandingang. Na sikuntu lohena doi' a'se're bageang lompona nauppa battu ri tau tabbalaya na ri pammarentana.

Na pangngare'na katua pa'hajuang Sappewali (ruang pulo allima taung amuru'na) nakua: "Anre' ba'laloja kusa'ring asusa jamaangna inni jama-jamaanga allante ri kamaengangna."

Sanggenna ri bangnginna aha' tanggala sampulo anrua, nagaukangi pole iamintu pa'tandingang



a'kelong *karoke* na pa'tandingang a'domeng. Naia tau a'tandinga rie'i ri labbia sibilangang tau na kabattuangna lohe todo' kampong.

Na narapi'mi ri bangnginna sala-sa tanggala sampulo angngappa', na napaumi pungkaha pa'kahajuangna Sappewali iamintu iangase'na tupabetaya.

Ri pa'tandingang caturua:

\*Nunomoro se'rea: M. Jufri battu ri Jampang desa Tambangang Kajang.

\*Nunomoro ruaya: Andi Opu battu ri Batuasang desa Singa Herlang.



\*Nunomoro tallua: Maryang anggota pulisi Herlang.

Ri pa'tandingang a'kelong:

\*Nunomoro se'rea: Hardiman battu ri Mallombong desa Tugondeng Herlang.

\*Nunomoro ruaya: Sinar battu ri Mallombong desa Tugondeng Herlang.

\*Nunomoro tallua: Erna battu ri Kupang desa Tugondeng Herlang.

Ri pa'tandingang a'domeng:

\*Nunomoro se'rea: Aco' battu ri Mallombong desa Tugondeng Herlang.

\*Nunomoro ruaya: Andi Loge battu ri Kilo Tuju desa Bonto Rannu Kajang.

\*Nunomoro tallua: Karim battu ri Kupang desa Tugondeng Herlang.

\*Nunomoro appa'a: Pudding battu ri Baddoa Herlang.

Na parallu kiisse'na angkua inni jama-jamaanga numpokokangi iamintu pa'rongoa balla'-balla' GTC (*generasi tidak campur*) battuangangna pa'rongo nutala sambarang namangei, siurang iangase' tau tabbalaya ilalang kampong. Nursalam, Kajang

angkuai pa' cama'ji iareka pa' hajiji lantama' ri suruga, mingka iangase'na taua a'ra' ngase'i antama' ri suruga. Na apa hojaangna surugaya? Iamintu a'sambajangi siurang sirampe haji'ta mange ri paranta tau, battuangna aki sangnging sirampe-rampe kodii. Na bara' a'kullei angkua kiu'rangi a'tarrusu pasanga ri taua kamase-masea ri Kajang panrita lopia ri Bulukumba angkua: Manyu' siparampe, tallang sipahua', a'lemo sibatu, a'bulo sipappa'."

Na katappusang pa'pau iamintu pa'pau battu ri se're kapala dusung ri Possi' Tana, nisabbu'mi angkua kapala dusung Bonto Sunggu Bakri S., angkua: "Kuerai ri ana' pa'rongoa bara' kamuanapa na'kulle inni pa'rongo-pa'rongoa a'sare sinara panggaugang mange ri tau toaya, na sipainga' ri sesena panggaugang nukodia." Nursalam, Kajang

Na nakua pole pa'sambe bupati: "Ako